



5. augusti 2016

UKA 2016/68

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara.

Timmisartuutileqatigiiffik Air Greenland nunatta tamakkiisumik pigisariaqarneranik, imaluunniit nunatta piginneqataassutaasa, 37,5 %-iusut, naalagaaffimmut imaluunniit SAS-imut tunineqarpata, taakku arlaat nunatsinnut imminut akilersinnaanerunersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Anthon Frederiksen, Partii Naleraq)

Tunngavilersuut:

UPA 2016 Inatsisartuni ataatsimiinnitsinni aningaasaqarnikkut ingerlatsineq pillugu nassuiaat inimi maani eqqartoratsigu, ilaatigut Air Greenland-ip piginneqataassutaasa annertussusiat ilanngullugu eqqartorparput.

Pingaartumik qanoq iliornikkut Air Greenland-ip sinneqartoorutaasa amerlanerpaat nunatsinniiginnarsinnaanerisa aqutissiuunneqarnissaat partiinit allanit aamma soqutigineqartoq maluginiarparput.

Tassami Partii Naleqqamiit assut pingaartipparput, aningaasat sapinngisami nunatsinni amerlanerpaat kaaviiartinneqarnissaat. Qularutiginnilarpulu partiit aamma allat uagutsitulli eqqarsartut.

Taamaammat pissusissamisoortutut isigaarput; aamma Air Greenland-imi piginneqataassutsit siunissami qanoq inissisimanissaat pillugu apeqqutit assigiinngitsut qulaarlugit eqqartorneqartariaqartut.

Uanilu apeqqummi, pingaarnarpaavoq, qanoq iliornikkut aningaasat amerlanerpaat maani nunatsinni kaaviiartissinnaanerivut pillugu oqallinnissaq.

Nalunngilarput, qujanartumik nunarput avataaniit soqutigineqaraluttuinnartoq aamma angallannerup tungaatigut.

Takornariartitsineq nunatsinni isumalluutit pingaarutillit ilagaat. Taamaattumik nunatsinni siunissami angallannermut tunngatillugu aamma pilersaarusiornuarnissaq, minnerunngitsumillu isumatuumik eqqarsarluarnissaq, pisariaqartorujussuuvoq. Taamaammatt apeqqutit qulaani eqqartukkavut aamma Air Greenland-imut tunngasut tamakkiisumik eqqartorneqarnissaat pisariaqartipparput.

Nunatta Air Greenland-imi piginneqataassutai taamaaginnassappaat , imaluunniit naalagaaffiup aamma SAS-ip piginneqataassutai nunatta tamaasa pisarisariaqarpai? Taamaassappat piginneqataassutsit suna naleraralugu uuttortarneqassappat?

Imaluunniit nunatta piginneqataassutai naalagaaffimmut SAS-imullu tunineqassappaat? Suna imminut nunatsinnut akilersinnaanerua?

Eqqaamasariaqartut ilagaat nunatta karsia ukiut tamaasa 100 mio-likkaanik Air Greenland-imut sullissinissaq pillugu isumaqatigiissutikkut aningaasaliisarmat, tamakku tamarmik nalilersuinermi ilaatinneqarnissaat pingaartipparput.

Soorunami Partii Naleqqamiit pingaarteqaarput, nunatta namminerisaminik timmisartuutiqatigiiffimmik peqarnissaa.

Apeqqutit ilagaat, qanoq iliornikkut angallaneq atuisunut akikinnerpaaq anguneqarsinnaava?

Oqallilluarnissarsi qilanaaraarput.

Anthon Frederiksen